



04. august 2009

UKA 2009/47

Inatsisartut suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

Inulerisunngorniarluni ilinniarfinni annertuumik innarluuteqartunut passussinnaanermik innarluuteqariaatsinillu assigiinngitsunik atuartitsissutini pinngitsoorani ilinniartitsinermik atuutilernissamik naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aleqa Hammond, Siumut)

Tunngavilersuut:

Naluneqanngitsutut nunatsinni annertuumik innarluutillit ajoraluartumik ikiliartunngillat. Inuiaqatigiinni sanngiinnerusortatta pitsaasumik kiffartuunneqarnissai pingaaruteqarpoq pisussaavugullu inuiaqatigiinni pisariaqartitsisut ikiorsernissaannut pisariaqartitaannut tulluarsartuassalluta.

Amerlasuutigut annertuumik innarluutilinnik sullissisut immikkut ilisimasaqarnissamik pisariaqartitsisarput soorlu nappaatinut, innarluuteqariaatsinut assigisaanullu tunngasunik. Ilinniagaqarnermi annertuumik innarluuteqarneq innarluuteqariaatsillu pillugit ilinniagaqarsimanngikkaanni sullissisusart artoarnartorsiorsinnaasarput nalorninerlu annertusarluni.

Tappiitsut, innorluutillit annertuumillu paaqqutarisariaqartut assut sulisunut nukissatigut piumasaqaateqarfiuvoq taamaattumillu sulisunit sullitanut ilisimasaqarnissaq aqqutissaavoq sulinermi oqilisaataaginnarnani sullitanut toqqissisimanermik tunniussisinnaasoq.

Inulerisunngorniarluni ilinniagaqarnermi allatuulli ilikkagassatut pingaartinneqarluni ilinniartitsissutigisariaqartoq tassaasoraara nunatsinni innarluutilittatta atugaannut tunngasunik ilinniartitsinissaq taassumalu ilinniartitsinermi ilikkakkat sinissami innarluutilittatsinnit nuannaarutigineqaannaratik sullissisut paarlagaannerujussuannik unikaallatsitsisinnaasuvoq aqqutissaq pitsaasoq. Siunnersuutima piviusunngortinneqarnissaanut aningaasartuutissat ilaqutariinnermut peqqissutsimullu naalakkersuisoqarfiup ilinniartitaanermullu naalakkersuisoqarfiup suleqatigiissutigalugu ataatsimoorussamik pingaarnersiuiikkut matussuserneqarsinnaavoq.

Ilinniagaqarnikkut pisussaaffilerneqarnikkut annertuumik innarluutilittatta siunissami pitsaannerusumik ikiorserneqaannaratik passunneqarsinnaalernissaat aqqutissiuussinnaavarput, tamannalu tunngavilersuutigalugu naalakkersuisut innarluutilittatta atugaannut aamma pitsanngorsaaqataannissaannut Inatsisartut aalajangiiffigisassaannik saqqummiussaqaarpunga.